

St. Louis Cardinals lo permiti Sidney Ponson duna demostracion na su facilidad na Florida

Pa scoutnan observa su condicionnan

ORANJESTAD- St. Louis Cardinals a bai di acuerdo c'un peticion di e representante di Sidney Ponson di Aruba, pa e haci uso di e facilidad di "springtraining" di e ekipo na Jupiter, Florida, pa usa un monticulo diahuebs venidero.

Esaki pa Sidney duna un demostracion di su condicion fisico, su capacidad tecnico y con su pitcheo ta bayendo te cu awor.

E demostracion di Sidney ta dirigi pa algun scout di varios ekipo di Liga Grandi, kendenan lo ta presente pa mira kico e pitcher di Aruba por na e momentonan aki y si esaki lo ta suficiente pa e bin na remarke pa un contrato.

Te cu siman pasa tabatin indicacion cu Sidney lo por a firma cu e ekipo di Texas Rangers di Liga Americana pero esaki no a tuma lugar ya cu informacionnan ricibi di parti di Deporte Bon Dia Aruba, ta mostra cu e representante di Sidney na Merca, tambe a tuma contacto c'un otro ekipo di Liga Americana loke no a cai na agrado di e ekipo di Rangers.

Esaki ta e motibo di con Sidney no a wordo invita pa bin springtraining cu e ekipo di Texas pero e organizacion lo manda un scout pa mira e demostracion di e pitcher di Aruba.

PUBLICIDAD

E mesun informacion aki cu a sali publica den e corant di St. Louis, esta St.-Today, ta mostra cu pa motibo cu Sidney lo haci uso di e facilidadnan di Cardinals, e ekipo lo tin scoutnan presenta tambe pa mira e actuacion di e pitcher Arubiano y sin duda e ekipo lo kier mira kico Sidney tin aden pa determina nan posicion.

Manager Tony LaRussa no kier a bai den detaye riba e asunto aki pero solamente a mostra cu mester tene un "mente habri" riba e asunto aki y mira kico ta bai pasa y kico Sidney lo por duna ainda.

Sidney Ponson temporada pasa a inicia cu St. Louis Cardinals pero despues a ser laga den libertad ora cu el a bira inefectivo y a nenga di bai bullpen, pero awor e ekipo ta mostra interesa pa mira kico ainda e por haci.

Un bentaha pa Sidney ta su experiencia di pitcha den Liga Grandi y segun informenan, awor e ta sinti su mes mihor y cu e dolor continuo den su braza drechi, ya no ta existi mas.

Tambe Sidney a baha bastante peso den ultimo simannan ora cu el a traha duro riba su condicion fisico pa cualkier oportunidad cu por presenta su mes.

ULTIMO OPORTUNIDAD

E presentacion aki di Sidney ta un intento pa e logra ainda haya un ekipo di Liga Grandi interesa, despues cu e no a completa e temporada den e Liga Dominicana.

A spera cu a base di su actuacion den e liga aki, e lo a acapara atencion di scoutnan di Liga Grandi pero e pitcher di Aruba a bai tras di e interes di Texas Rangers cu cual e tabatin palabracion caba haci.

Sinembargo cierto desaroyonan a pone cu Rangers a "back-off" y no a keda nada otro cu organiza awor un tipo di demostracion pa Sidney muestra su condicion fisico.

Entre otro Sidney a traha riba su condicion fisico, a pasa den un programa di bahamento di peso estricto y ta luci den bon forma pa cuminsa prepara cu cualkier ekipo di Liga Grandi cu lo ta interesa den su servicionan.

